

**Месяца сентября в 18-й день
Попразднство Воздвижения Креста Господня
и преподобнаго Илариона Оптинскаго**

На малей вечерни

На Господи, возвах: преподобному стихиры, глас 1:

Приидите, празднлюбцы,/ днесь восхвалим лик честный,/ преподобных старцев Оптинских,/ в земли Калужской просиявших,/ яко многоценнии бисери;/ и вкупе с ними прославим богомудраго Илариона,/ ублажающе того достойно.

Красуйся ныне и ликуй/ благословенная пустыне Оптинская,/ возрастившая, яко крины благоуханныя,/ преподобныя отцы наша,/ от нихже старец Иларион всехвальный есть,/ егоже ныне ублажаем,/ добродетелей дивнаго наставника/ и правило монашествующих.

Божественная веления исполняя,/ в подвизах послушания крепок показался еси/ и, яко новый Елисей,/ благодать старчества от преподобнаго Макария достойно восприял еси,/ отче Иларионе блаженне,/ темже и почитающих память твою/ духовныя радости исполни.

Слава, преподобному, глас 6:

Ликовствует ныне Церковь Русская,/ наипаче же Оптина пустынь величает тя,/ отче Иларионе прехвальне,/ мы же, немощная чада твоя,/ любовью тя почитающе,/ молим испросити нам у Господа мир и велию милость.

И ныне, праздника.

На стиховне стихиры преподобному, глас 2:

Благая и спасительная/ слезами покаянными сеявый,/ сторичный плод добродетелей возрастил еси/ и Богу Благоутробному во смирении глубоце принесл еси,/ преподобне отче Иларионе,/ сего ради верно тя похваляем.

Стих: Честна пред Господем/ смерть преподобных Его.

Благочестнаго жития по Бозе взыскуя,/ в подвизах постнических утвердился еси/ и, яко маслина многоплодная,/ в

Оптине пустыни процвел еси;/ темже память твою светло празднуем/ и молимся спастися душам нашим.

Стих: Блажен муж, бояйся Господа,/ в заповедех Его восхощет зело.

Благонравным житием шествуя,/ достигл еси в мужа совершенна/ и в подвизах добродетелей искусна;/ темже и многия ученики наставил еси,/ блаженне отче Иларионе,/ и, якоже сотворивый и научивый,/ мзду от Бога многую приял еси.

Слава, преподобному, глас тойже:

Якоже отрасль добрая родителей благонравных,/ жизнь твою в день праздника Пасхи от Господа восприял еси, преподобне,/ ныне же в невечернем свете Христове,/ причащаяся нескончаемая Пасхи,/ моли и нам тоя сподобитися.

И ныне, праздника.

Тропарь преподобному писан на велицей вечерни.

Слава, и ныне, праздника.

На велицей вечерни.

На Господи возвах: стихиры на 8, глас 5:

Радуйся, Иларионе, светило благочестия,/ мысленный мрак нечестия просветивый/ и озаривый словом истины сословия всяческая,/ подвигнув к похвалению Бога,/ во Единой Троице славимаго,/ ты бо, якоже лучами солнечными, разумы заблуждшия просветил еси/ и Церковь одеждою златославною украсил еси./ Темже, богопроповедниче Иларионе,/ моли Христа, Солнце Правды,/ светом Истины нам озаритися/ и улучшить мир и велию милость.

Радуйся, преподобне Иларионе,/ постников удобрение,/ право мыслящих утверждение,/ на враги церковныя победо,/ Оптины пустыни похваление всекрасное,/ догматов чистое зеркало,/ раскольнических умов низложение,/ мудрости старческаго вместилище!/ Моли, богопросвещенный отче, Христа Бога,/ даровати Православию утверждение,/ Церквам единомыслие,/ иноком веру истинную,/ людем во благочестии укрепление,/ мир и велию милость.

Радуйся, врачу безмездный,/ врачевателю душ богомудрый,/ светильниче молитвы неугасимый,/ елеем премудрости Небесныя умягчающий струпы наша греховныя,/ и, яже от нападений демонских, раны исцеляющий./ Темже, отче Иларионе,/ моли Христа Бога даровати нам/ мир и велию милость.

Радуйся, богомудре Иларионе,/ блаженство райское улучивый,/ яко истинный ученик Христов:/ совершенно Божия заповеди усвоив/ и живота вечнаго глаголы уяснив,/ деянием вся сия исполнил еси./ Мы же молим тя, отче:/ не остави нас, сырых,/ заблуждаться на путех земных,/ взыщи молитвою твоею/ и на стезю истинную настави,/ да сподобимся от Христа улучшить/ мир и велию милость.

Слава, преподобному, глас 6:

Светильника веры ты познахом,/ Иларионе, Христов угодниче,/ иже отеческих преданий не оставил еси,/ еретическая же мудрования возненавидев,/ учителя ложныя сокрушил еси/ и раскольники победительно посрамил еси,/ Отца и Сына и Святаго Духа исповедав,/ пастырь добрый стада Христова явился еси./ О нас, преподобне, молися ко Благодетелю всех,/ еже ущедрити и спасти души наша.

И ныне, праздника.

Вход. Прокимен дне. И чтения три преподобническая.

На литии стихира праздника и преподобному, глас 1:

Ангельски пожив на земли,/ к Свету Невечернему, славне, взялся еси,/ оставль нам божественнаго смирения образ,/ трудолюбия твоего вожденное правило/ и добродетелей немерцающую зарю./ Ныне же со ангельскими чинми Богу предстоиши,/ и о всем мире дерзновенно молишися./ Поминай нас, любовию совершающих память твою,/ преподобне Иларионе,/ и отеческим твоим заступлением/ еретическующих востания разори/ и испроси Церкви Русской/ мир и велию милость.

Победил еси страстей восстание умерщвлением плоти/ и, в бытие вечное родився,/ яко новая тварь во Христе,/ Духом

Святым просветился еси,/ в ризу же нетления одеявся,/ званная вечери Царския сподобился еси./ Темже молим тя, отче Иларионе,/ помози и нам покаянием очиститися/ и в чертог Господень внити.

Глас 2:

Киими словесы восхвалим тя, отче Иларионе?/ Како изочтем добродетели твоя,/ в сени смертней греховнаго жития пребывающе?/ Како достойно воспоем труды твоя?/ Кий язык возможет изрещи блага, ихже сподобился еси?/ Ты бо, узким путем шествуя,/ во дворех Бога нашего радостно вселился еси,/ и нас сподоби того достигнути.

Смирением Христу подражая,/ клеветы и поношения благодушно терпя/ и за обидящих тепле моляся,/ многия беды и скорби понесл еси./ Ныне же, преподобне, моли о нас, грешных и злонравных,/ да истребится всякая нечистота/ из сердец наших.

Слава, глас тойже:

Красуйся, Церковь Русская,/ днесь воспеваючи сына твоего,/ преподобнаго Илариона Оптинскаго,/ мужа совершенна,/ тя, яко мать многочадную возлюбльшаго,/ и даже до последняго издыхания/ усердие к тебе сохраняшаго/ и чадом своим тя любити завещавшаго.

И ныне, праздника.

На стиховне стихиры преподобному, глас 1.

Подобен: Небесных чинов:

Преподобне отче Иларионе,/ радуется о тебе Калужская земля,/ наипаче же славится пустынь Оптина,/ в сонме бо преподобных старцев,/ яко звезда пресветлая сияеши/ и Христа Бога вкупе с ними тепле молиши/ о спасении душ наших.

Стих: Честна пред Господем/ смерть преподобных Его.

Преподобне отче Иларионе,/ вся коварства злокозненнаго мучителя/ силою Божию разрушил еси,/ выну очи мысленная горе вперяя,/ сердцем же к Богу устремляяся,/ яко финикс, насажденный рукою Господней,/ ныне в вертограде Небеснем процвел еси/.

Стих: Блажен муж, бояйся Господа,/ в заповедех Его восхощет зело.

Преподобне отче Иларионе,/ ты, яко добрый строитель,/ на крепцем камени Христове/ храмину души твоея воздвигл еси/ и, яко земледелец трудолюбивый,/ землю сердца твоего со тщанием возделав,/ многими добродетельми украсил еси,/ имиже питаеши духовныя чада твоя.

Слава, глас 8:

Днесь наста день торжества твоего,/ верный рабе Христов Иларионе,/ ты бо, яко воин добропобедный,/ лютаго змия силою Божию низложив,/ венцем нетленным от Христа увенчался еси/ и в Церковь Небесную с ликованием вшел еси.

И ныне, праздника.

На благословении хлебов, тропарь святаго дважды, и праздника единожды.

Тропарь, глас 4:

Божественный врачевателю страстей,/ веры искусный кормчий воистинну,/ приял еси от Господа благодать исцелений,/ и на демонов славныя победы,/ Иларионе, отче предивне,/ вся бо тайная обличил еси,/ еретическия умыслы разорив./ Темже молися Христу Богу,/ от прелести диавольския избавити/ и спасти души наша.

Ин тропарь, глас 7:

Мира красная возненавидев,/ мир душевный в души стяжал еси,/ земная же наслаждения презрев,/ Небесными дарованиями обогатился еси./ Темже, и тьму раскола отгнав,/ стадо Христово добре упасл еси,/ спасай и нас молитвами твоими,/ Иларионе старче богопросвещенный.

На утрени

На Бог Господь: тропарь праздника дважды. Слава, тропарь святаго. И ныне, праздника.

По 1-м стихословии седален, глас 3:

Светлостию подвигов богоприятных просиял еси, отче,/ еретическую тьму разгоняя/ и добродетельми всяческими украшаяся,/ обитель Духа Пресвятаго явился еси./ Темже ныне,

Иларионе, источаеши верным исцеления,/ яко сосуд исполнь благодати Божия.

Слава, и ныне, праздника.

По 2-м стихословии седален, глас 2:

В соборе богоизбраннем ныне предстоиши, Иларионе праведне,/ старчества Оптинского утверждение незыблемое,/ догматы бо оградив стадо твое,/ к вере Православней паству путеводил еси,/ темже всегда ограждай от бед обитель твою.

Слава, и ныне, праздника.

По полиелеи седален, глас 6:

Яко звезду пресветлую, зрит тя ныне Оптина пустынь,/ Иларионе богомудре отче,/ лучами бо веры прогоняеши неведения мглу/ и разумы просвещаеши зарею Троицскою./ Темже убо моли Светодавца Христа,/ да просветит нас Светом Своего богоразумия,/ любовьию почитающих священную память твою.

Слава, и ныне, праздника.

Степенна, 1-й антифон 4-го гласа. Прокимен глас 4: Честна пред Господем/ смерть преподобных Его. **Стих: Что воздам Господеви о всех, яже воздаде ми? Евангелие от Матфея, зачало 43.**

По 50-м псалме стихира, глас 6:

Наставник богомудрый,/ Церкви Русския благоглаголивья уста,/ Духа орган доброголасный,/ лжу расколов посрамляяй,/ долу влекущая страсти отсекаяй/ и к высоте богопознания возвышаяй,/ Иларион преподобный ныне да почтится,/ веры правья поборник/ и молитвенник о душах наших.

Канон праздника, с ирмосом на 6 и святого на 8.

Канон святого, глас 8.

Песнь 1

Ирмос: *Колесницегонителя фараоня погрузи/ чудотвори иногда/ Моисейский жезл, крестообразно поразив/ и разделив море:/ Израиля же беглеца пешеходца спасе,/ песнь Богови воспевающа.*

Родителю издетска в послушании навик, с млеко матери веру Христову впитал еси, знаменався в рождестве твоём светом Воскресения Христова.

Ратоборец искусен показался еси, егда невидимая полчища бесовския постом, бдением и молитвою победил еси, темже молим тя, преподобне, помози и нам в духовных бранех устояти.

Египтян мысленных зело усмирил еси, непрестанно имя Христово призывая, и, яко фараонитское воинство, водою слез твоих потопил еси, песнь Богу воспевая.

Богородичен: Палато Небеснаго Царя, во чреве вместившая Невместимаго, Всепречистая Дево Богородице, услыши нас грешных, молящихся Тебе, и побори врагов, борющихся нас.

Песнь 3

Ирмос: *Утверждей в начале небеса разумом/ и землю на водах основавый,/ на камени мя, Христе, заповедей Твоих утверди:/ яко несть свят паче Тебе, Едине Человеколюбче.*

Светом Христовым просвещая землю Русскую и расколоучителей обличая нечестие, спасл еси овцы Христовы от гибели вечныя.

Наставников твоих, Льва и Макария, достойный учениче и послушниче преизрядный сый, в низжайшем смирении сердечнем высок пред Господем явился еси.

Любовию движимый, еже Богу Единому работати, вся красная мира презрел еси и, по Бозе житие ревностно облобызав, верный последователь Христа явился еси, с Нимже и царствуеши ныне.

Богородичен: Богородице Дево, простри в молитве руке к воздвигаемому на Кресте Сыну Твоему, Пречистая, за ны, грешныя, волею распеншемуся, да избавит нас от работы вражия.

Кондак и икос праздника.

Седален, глас 5:

Небесных ликов подобниче, отче праведне, ныне в велицей славе незаходимей ликуеши и любовию на ны, грешныя и немощныя, взираеши, обаче приими похвалы, бренными

устнами тебе воспеваемая, еже умолити Милосердного Бога даровати нам потребная ко спасению.

Слава, и ныне, праздника.

Песнь 4

Ирмос: *Ты моя крепость, Господи,/ Ты моя и сила,/ Ты мой Бог, Ты мое радование,/ не оставь недра Отца/ и нашу нищету посетив./ Тем с пророком Аввакумом зову Ти:/ силе Твоей слава, Человеколюбче.*

Цевница духовная был еси, отче, возвещая от Божиих словес, отгуду бо почерпл еси разум божественный и всем, к тебе притекающим, преподавал еси благочестно.

Апостольски поревновав, преподобне, заблуждшия и прельщенные из рова погибельнаго извел еси и, еретическая собрания пресек, лжеучители праведному суду предал еси.

Веру Православную сохраняя, якоже учил, такожде и творил еси: мирскому предпочел еси монашеское, тем и житие твое прославися.

Богородичен: **Едина** Чистая в женах, Мати сподобившиися быти Господа, на руку носила еси Безначальнаго и от сосцу питала еси Безлетнаго. Того убо моли спасти поюция Тя.

Песнь 5

Ирмос: *Вскую мя отринул еси/ от Лица Твоего, Свете Незаходимый,/ и покрыла мя есть чуждая тьма, окаяннаго./ Но обрати мя, и к свету заповедей Твоих/ пути моя направи, молюся.*

К подвигу иноческому приступив неослабным умом, истины разумение приял еси, ангельским же чином поревновав, волю божественную исполнити потщался еси.

Восхождение в сердце своем положил еси, в молитве непрестанно поучаяся, и всенощными твоими бденими нощи яко дни светозарны, показал еси.

Илиину ревность к Богоугождению имея и, яко Иосиф, целомудрие храня, вельми Богу угодил еси и со избранными сопричтен был еси. Испроси и нам невещественная блага воспряти.

Богородичен: Распинаемаго на Кресте зрящи Сына Твоего, слезно вопияла еси, Мати Божия, оружие бо нестерпимыя скорби душу Твою пройде, обаче ныне дарова Тебе Христос Бог неизреченную радость.

Песнь 6

Ирмос: *Очисти мя, Спасе,/ многа бо беззакония моя,/ и из глубины зол возведи, молюся:/ к Тебе бо возопих и услыши мя,/ Боже спасения моего.*

Всемудрый ум стяжав и воли своя отложение усвоив, послушанием ко источнику мудрости притекл еси и чистыя воды разсуждения испил еси.

Око духовное во бдениих изошрив, зрел еси законы бытия вечнаго и, грядущая, яко настоящая провидя, от бед и скорбей чад своих охранял еси. Тако и нас, преподобне, от бед избави.

Дивное чудо сотвори тобою Господь, егда ты, отче, благословив жену неплодную, на будущее лето со чадом приити повелел еси. Тако и нас, добродетелей не имущих, благослови и сотвори благоплодны.

Богородичен: Егда книги совестныя разгнутся и станет Нелицеприятный Судия на Судищи Своем, тогда воздежи богоприемней руце Твои, Пречистая Богородице, и сподоби нас одесную Сына Твоего стати.

Кондак, глас 5:

Сотаинниче старцев Оптинских/ и сонаследниче предела Владычицы,/ яко древо плодовитое, в пустынном вертограде процвел еси/ и, яко пастырь добрый, стадо Христово утвердил еси./ Ныне же моли Христа Бога/ в Православии сохранитися и в благочестии утвердитися/ любовью тя почитающим.

Икос:

Лютою болезнию изнуряемь, Иову Многострадальному подражая, непрестанно Бога благодарил еси, и за сие возда тебе Господь и в Царстве смиренных и кротких упокои. Мы же, дивящися подвигу жития твоего, умильно вопием ти: радуйся, монашествующим образе терпения; радуйся, подвизающимся о Господе крепкий помощниче. Радуйся, Руси Святыя присный

молитвенниче; радуйся, похвало и радование, любовью ты почитающим.

Песнь 7

Ирмос: *Божия снизхождения/ огонь устыдеса в Вавилоне иногда:/ сего ради отроцы в печи радованною ногою,/ яко во цветнице ликующе, пояху:/ благословен еси, Боже отец наших.*

Недреманно око сердца твоего соблюл еси/ и тайная коварства демонская изблещил еси,/ тьму прелестную разгоняя непрестанным псалмопением:/ благословен еси, Господи, взывая.

Престолу Божию предстоя, предстательствуеши молитвою твоею за пустынь Оптину, научая всех верных пети: благословен еси, Боже отец наших.

Вещественная блага отринув, невещественнаго пакибытия причастник соделался еси и, яко добрый делатель винограда Христова, мзду Небесную со всеми святыми приял еси, воспевая: благословен еси, Боже отец наших.

Убежище благоотишное в Оптиной пустыни обрет, мятущияся души людския миром и любовью исполнял еси, научая всех выну воспевати: благословен еси, Боже отец наших.

Богородичен: Тебе и Стену и Пристанище имамы, и Молитвенницу благоприятну к Богу, помяни нас во Царствии Сына Твоего, Дево Пречистая.

Песнь 8

Ирмос: *Седмерицею печь/ халдейский мучитель/ благочестивым неустовно разжже,/ силою же лучшею спасены сия видеи,/ Творцу и Избавителю вопияше:/ отроцы, благословите,/ священницы, воспойте,/ людие, превозносите во вся веки.*

В молитве к тебе прибегаем и защищения у тебе просим: избави стадо Христово от волков, губящих е, и еретичествующих нападения вконец разори.

Егда богоносный старец Макарий, авва твой, преставися ко Господу, тогда ты сирот его духовных не оставил еси, словом Божиим тех неленостно питай.

Елицы под законом ходят, раби суть Господни, ты же, любовию объятый и сердце Богу в дар принесый, яко чадо Христу усвоился еси: сподоби и нас Того всем сердцем возлюбити и наследники благ Небесных соделатися.

Богородичен: Светлое ангелов Ликование, Кадильнице молитв святых благовонная, Начальника жизни наша во чреве Своем носившая, Того моли, Мати Божия, да примет нас в Небесныя чертоги.

Песнь 9

Ирмос: Ужасеся о сем Небо,/ и земли удивишася концы,/ яко Бог явися человеком плотски/ и чрево Твое бысть пространнейшее небес./ Тем Тя, Богородицу,/ ангелов и человек чиновначалия величают.

Идеже умножил еси талант духовный, zde ныне пребывают честныя мощи твоя, ту посещай, и твоя певцы любовию назирай, ты непрестанно величающия.

Истинный ученик Христов быв, потщался еси одежды души твоя слезами покаянными омыти и вонями добродетелей умастити. Темже на брачную вечерю невозбранно вшел еси, и нас тоя сподоби.

О, присный делателю молитвы, отче преподобне! Ты, ум на стражи сердца своего утвердив, всякий лукавый помысл именем Христовым искусно посекал еси и чистотою сердечною Бога узрел еси. Сподоби и нас чистым сердцем Того славити.

Богородичен: Тя, Богородице Дево, Ходатаицу теплую и стену небориму имуще, яко Молитвенницу за ны неотступную песненно восхваляем.

Светилен:

Многими страстьми обуреваемы, молим тя, отче Иларионе: исхити нас из челюстей адскаго змия и сподоби светом Христовым просветитися, и на Крест Честный с веселием взирати, яко тем искуплены есмы от работы вражия.

**Слава, и ныне, праздника.
На хвалитех стихиры, глас 4:**

Монашествующих столпе крепкий,/ богомудрый преемниче старчества Оптинскаго,/ трудолюбия дивное правило,/ бесов смиренный прогонителю,/ делателю умныя молитвы,/ старче наш Иларионе,/ в твоей памяти светло собранных/ огради покровом молитв твоих.

Образе послушания,/ монашествующих похвало,/ иноков украшение,/ преподобне отче Иларионе,/ вемы тя добродетелей наставника,/ возводящаго души к Небеси,/ темже ты ныне любовь убожаем.

Благочестия учителю,/ раскола искоренителю мудрый,/ пастырю добрый, Иларионе,/ соблюди стадо твое молитвами твоими/ и нерасхищено Христу Пастыреначальнику приведи,/ да празднуем торжество твое светоносное.

Слава, глас 1:

Днесь собор Оптинских отцев,/ собравшихся в пустыни Христа ради,/ сретает поборника Православныя веры,/ егоже приемши, ликует Небесная Церковь./ Темже и мы, лик составльше,/ твое преставление чествуем, вопиюще благочестно:/ радуйся, преподобне Иларионе,/ от мира пришедый в монашеское ополчение;/ радуйся, старче всехвальный,/ Православную веру неврежденну хранивый;/ радуйся, молитвенниче о душах наших.

И ныне, праздника.

На Литургии служба праздника и преподобному.

Молитва

О, богомудре отче наш Иларионе! Веры Православныя истинный поборниче и крепкий молитвенниче о душах наших пред Престолом Святыя Троицы! Ты, ревностию зельною о вере истинней еще от юности твоея распалився, от расколоучителей паству церковную хранил еси. Ты многия души от погибельнаго заблуждения спасл еси и прельщенные к разумению Истины привел еси, темже за правоту сердца твоего даровася ти от Бога благодать исцелений. И ныне, отче, призри на паству твою и

посети ю и наветы лукавых духов твоим предстательством разори; разум наш просвети, еже не внимати нам духовом обольстительным, выну всевающим в нас вражду и нестроение, имиже разоряется мир церковный и братии единомыслие. Ей, отче, испроси у Господа мир и благоденствие стране нашей и людем ея веры правыя утверждение и еретичествующих низложение, нам же подаждь здравие душевное и телесное, совесть чистую и жительство незазорное, да сподобимся вкупе с тобою, славити великолепое Имя Единосущныя и Нераздельныя Троицы, Отца и Сына и Святаго Духа, во веки веков. **А**минь.